

M. Manca 650 n. 5

POMPEI MVTI

I. V. D.

In diem sanctum Pentecostes.

ORATIO

AD SANCTISSIMUM D. N.

P A V L V M V.

P O N T. M A X.

Habita in Templo S. Petri die X. Iunii 1612.



POMPEI MVTI

I. V. D.

In diebus sanctis Romanis

ORATIO

AD SANCTISSIMUM

P. V. L. V. M. V.

PONTIFICI

Maximo



Handwritten text along the right margin, possibly a library or collection stamp.



DE SANCTI SPIRITVS
MISSIONE

In diem sanctum Pentecostes.

A D

P A V L V M V.
P O N T . M A X .



O V A hæc fulgentis, tonantis, fulmi-
nantisq. cœli species, si quem ad sui
contuitum contemplationemq. non
trahit, hunc ego, cœlum qui tueatur,
vnquam, indignum esse existimo Pater
Beatissime. Me certè admirabilis hæc
species planè rapit, quippe cui persua-
sum est fragorem hunc vocem esse cœ-
lestem, linguasq. illas Ecclesiæ verticibus insidentes non ma-
gis quid de Deo ab Apostolis hodierni diei munere, quàm
quid de ipsa hodierni muneris magnitudine dicendum à no-
bis sit, loquaci taciturnitate demonstrare. Et verò quem

non rapiat in admirationem sui portentosa hæc; & naturæ planè incognita tempestas? irasci nos cœlum dicimus si fortè frequenti nube contracta remurmurare primò, micare post paulò, iaculari demum conspiciemur. Iure sanè, nam & hilaritas cœli quædam, est ipsa eius serenitas, quæ nubilo tollitur, & iurgium irati hominis tonitru imitatur, quod ne vanum putetur, & inerme horrendi post sonum ignes telis armati exitialibus efficiunt. Nunc autem qualis est cœli, tonantis illius quidè, fulminantisq. cum fulgetro, sed minimè irati facies, immò nunc maximè benefici? Quæ enim beneficentia maior, quam cum nobis Spiritum submittere, quem diuinarum omnium opum largitorem, ille nobis tandem effudit Deus, qui nunquam se, nisi benè faciendo Deum esse existimauit? Verùm singula, si placet, beneficæ huius tempestatis indicia contemplemur. Primùm è cœlo sonus; quod meo quidè iudicio non frustra sit. Nam quorsum attinet cœlum illud quo per tacitissimas vertigines labente innumerabilia ad nos beneficia defluunt, nunc tandem nescio qua ratione contactum, velle suæ beneficentiæ præconem habere nouum, hunc, qui exauditur è cœlo sonum, hoc est planè se ipsum? vt mihi quidem suspicionem faciat, sonum hunc fragorem esse referati eas ad opes mortalibus profundèdas cœli, quibus quoniam suas non habent, vt minores aliæ, per quas emittantur, fores, noua aperienda fuerint, non sine inusitato cœli plangore ærarij cœlestis claustra. Nisi fortè illud satius fuerit opinari, cœlitum hunc esse plausum, qui peracto iam extremo nostræ reparationis actu, auctori Deo, actori Dei filio, à magnis cœli ciuibus, frequentissimo beatorum theatro congeminetur in cœlo. Quod vt quale sit appareat Pater Beatissime. Sic ego existimo, vt omnium fabularum, quamuis multiplici personarum, actuumq. varietate distinctarum, eò articuli omnes, & quidam quasi gradus diriguntur, quò eius spectare exitum auctor voluit; ità reparationis nostræ admirabile illud planè spectaculum, quod ipsa cœli lumina, dum ederetur, insolita admiratione suspendit; hunc spectasse

semper finem : cœlestis flammæ in hominum animis , vel extinctæ iam , vel sopitæ accensionem , quam hodierna luce perfectam esse , cum ignis hic declaret ; mirum non est si quasi postremo actu concluso , plausum frequenter de cœlo sit . Neque verò dubito , quin gratissimus hic magno actori Dei filio plausus acciderit , qui enim accendi ignem hunc tantis studijs concupiuit , tantoq. labore olim contendit , inflammatum eum iam foeliciter adeo ut , quia eius vim humani peccatoris angustia non capiunt ; erumpat foras , non potest non summa cum voluptate spectare . Quamquam mihi quidem cœlestis hic sonus (si quid ex veterum sapientium licet placitis decerpere) diuinarum cantus , & admodulatio Syrenum videri consuevit , ita enim mecum ratiocinari soleo , si navigationis instar turbulenta hæc habet vita , quam degimus , portus certè aliquis , ne ad infinitum periculum procreati , videamur , fessis , ut ille ait , maris , & viarum aperiendus est . Nunc verò quia portum non nisi cœleste domicilium aperire potest animis cœlesti origine propagatis ; faciendum fuit , ut si festo cum sonitu , lætisq. vocibus , ac symphoniacorum cantu inuehentes ex alto , naues recipiuntur , singularis aliquis paratus esset in cœlo concentus ijs qui se in sinum foelicitatis ex hac periculosa nauigatione recipiunt ; quod quidē quia hodierna primū luce , afflante , nunc tandem secunda diuini spiritus aura , assequi licet ; inusitato cantu quasi nouo inuitamento beatitatis littora sonuerunt . Sed nos nimis diu cœlestis hic tenuit concentus , quem vrinam qualis in illa beatæ vitæ ora editur , percipere mortalibus liceret , nulla profectò nos pericula , nulli scopuli , nullæ fluctuum immanitates , quin eò , vnde erumpit , velis , remisq. contenderemus retinere possent . Nunc vel fractas eius emorientis in tanta spatiorum longinquitate reliquias & in soni murmur vehementioris deformatas hac ipsa sensus hebetudine colligere nequaquam piguit . Hactenus ergò de sono , nam si eò vnde exorsi sumus redeundum est , quænam est obsecro , ut initio dicebam , cœli hæc non tonantis modò , sed fulgentis ,

fulminantisq. facies & tonantis audiuius, fulgentis, fulminantisq. paucis, si placet, videamus. Fulgurat illud quidem: ignes è cœlo frequentes emicant; sed sine noxa, indices sunt insequentis non teli, sed medicinæ, neque noxæ prælucent, sed beneficio. Et verò decuit tantum bonum non sine noua cœlestium ignium pompa mortalibus deferri. Faces olim dum nouæ conciliarentur nuptiæ altè prælatas in veterum monumentis memini me olim legere. O incredibilem, siue humanæ dignitatis, siue demissionis diuinæ modum. Ausim quouis pignore contendere, Pater Beatissime, flammæ hæc comparatas esse diuinitus, quibus inter Deum, sponsamq. eius Ecclesiam conciliatæ sunt nuptiæ, quas equidem in humanæ linguæ modum, formamq. emicuisse non miror; quæ enim his nuptiis propagatur soboles ex auditu fidei procreanda erat; quod quia inania, & emortua verba, nunquam efficient, ignea actiuosa, medullas, sensusq. intimos penetrantia, hoc est planè diuina diuinitus efformantur. Et hæc ipsa tela sunt, hæc fulmina, vt planè amore fulminare hodierna luce cœlum videatur. Etenim si imperiosus est amor, si suaui quadam tyrannide violentus, si sentiuntur eius vulnera, & placent tamen, non video quibus artibus, quæue pompa fulgere ac fulminare aptius hodierna luce potuerit, quàm & igne, & eo igne, qui lucere primum posset, vrere nesciret, vulnus deinde, vel nullum infligeret, vel certè salutare. Argumento sit quod clausa olim ora, atque præmorta ad eò vitaliter animauit, vt alijs etiam salutari voce, quasi vitæ afflatu vitam, atque animam restituerint. Quæ si ita sunt, vt dixi, Pater Beatissime, facile illud colligam, nouum tandem (quod ab antiquissimis proditum oraculis olim scimus) nouum inquam tandem cœlum hodierna luce perfectum esse diuinitus. Cur enim nouum cœlum illud esse negem, quod neque si vehementius insonuerit, iratum, neque si fulguret minax, neque demum hostile si fulminet, possis iure dicere? Vtinam verò id quod altera eiusdem oraculi vox prænunciauit in nos vsquequaque conueniat, vt ad noui huius